



# Informativni bilten Općine Vareš

## Posljedice obilnih padavina



## Izdavanje ličnih dokumenata ponovo u Policiji stanci Vareš!





## PRIRODNE NEPOGODE

Svjedoci smo da je u prethodnih mjesec dana naša zemlja pogođena jakim kišama, što je u velikom broju gradova izazvalo velike materijalne štete.

Na području naše općine, a prema podacima nadležnih službi, uprkos velikoj količini padavina nije bilo većih materijalnih šteta.

Prema ovim podacima na dionici lokalnog puta Pajtov Han – Budoželje dana, 07. 01. 2010. godine je evidentiran odron kamena koji je izazvao otežano odvijanje saobraćaja na pomenutoj dionici. Na istoj dionici je evidentirano i začepljenje odvodnih kanala što je izazvalo izlivanje vode na put i dodatno otežalo odvijanje saobraćaja.

Dana, 09. 01. 2010. godine je došlo do izlivanja vode u Tunelu na putu Vareš – Olovo što je otežalo odvijanje saobraćaja. Radnici firme "Nahonal" djelovali su na vrijeme, kako bi sve doveli pod kontrolu i kako bi se saobraćaj odvijao nesmetano u čemu su i uspjeli tako da nije bilo prekida u saobraćaju.

Istoga dana oko 17,00 sati na regionalnom putu 444 u mjestu Prnjavor, neposredno iza Benzinske pumpe "Butmir" je došlo do odrona zemlje i kamena na desnu kolovoznu traku gledano u pravcu Vareš – Breza što je predstavljalo opasnost za učesnike u saobraćaju. Radnici firme Nahonal su o tome obaviješteni te su izašli na lice mjesta i uklonili materijal tako da je stanje na tom dijelu regionalnog puta 444 brzo normalizirano.

Dan poslije je došlo do urušavanja potpornog zida u ul. Matijevići uz rijeku Stavnju u dužini od oko deset metara. Saobraćanje u pomenutoj ulici se odvija uz potencijalnu opasnost, a realnom se čini i mogućnost urušavanja kolovoza pomenute ulice.

Pored navedenih, većih materijalnih šteta nije bilo na području općine Vareš.

## UDRUŽENJE SLIJEPIH I SLABOVIDNIH GRAĐANA OPĆINE VAREŠ



Početak decembra prošle godine u maloj sali Udruženja građana penzionera-umirovljenika općine Vareš, Udruženje slijepih i slabovidnih građana općine Vareš (USSG) je organizovalo podjelu pomagala za slijepa i slabovidna lica koja su članovi ovog udruženja.

Dodjeli pomagala su prisustvovali: Općinski načelnik, predsjedavajući Općinskog vijeća i predsjednici klubova vijećnika.

Od dvadeset i dva člana Udruženja njih osam je dobilo neko od pomagala.

Udruženje je dobilo donaciju od "The Tour 2 Vareš - 2009" u novčanom iznosu od 1000,00 KM i za ova sredstva Udruženje je kupilo ortopedska pomagala za svoje članove:

- šah za slijepa i slabovidne osobe;
- četiri CD-pleyera;
- dva ručna sata.

Od Općine Vareš Udruženje je dobilo 350,00 KM i za ova sredstva kupilo jedan ručni sat za slijepa i slabovidna lica i izmirilo materijalne troškove oko nabavke istog.

Sva pomenuta pomagala nabavljena su preko firme ASISTANSIA d.o.o. Sarajevo koja se bavi nabavkom i prodajom ortopedskih pomagala.

Osim gore navedenih donacija, Nada Popić je donirala tri velika i četiri mala

štapa, a Teo Musić je donirao troje naočale za slabovidna lica.

Svaka donacija u bilo kojem obliku je dobro došla članovima ovog Udruženja i predstavlja bolje sutra nekome od njih.

## RURALNI RAZVOJ

U projektu jačanja lokalne uprave u Bosni i Hercegovini kroz učešće civilnog društva u procesima upravljanja i odlučivanja, a s ciljem aktiviranja lokalnog gospodarstva, realizuje se pilot projekat čiji potpisnici su općine Breza, Vareš, Vogošća, APRODEL (Agencija profesionalaca lokalnog razvoja Madrid Španija) i SERDA (Sarajevska regionalna razvojna agencija) Sarajevo. Objavljen je Javni poziv, a predmet poziva je dodjela bespovratnih novčanih sredstava za sufinansiranje projekata iz oblasti: ruralni turizam, valorizacija i komercijalizacija poljoprivrednih proizvoda, mala i srednja preduzeća, valorizacija kulturne baštine.

Javni poziv za aplikaciju nevladinih organizacija i fizičkih lica je zatvoren dana 04. 12. 2009. godine, a na isti se prijavilo ukupno 30 aplikanata. Od ukupnog broja prijavljenih, sa područja općine Vareš je 8 aplikanata (4 nevladine organizacije i 4 fizička lica).

Tehnička ekipa LAG-a je 11. 12. 2009. god. izvršila otvaranje prispjelih aplikacija, pregledala aplikacije i uputila dopise za dopunu aplikacija. Sljedeća etapa realizacije ovog projekta se ogleda u pravljenju tehničkih izvještaja za svaki projekat i njihovo dostavljanje u SERDU, prevođenje i dostavljanje APRODEL-u (Agenciji profesionalaca lokalnog razvoja Madrid Španija). Dostavljene aplikacije će 28. i 29. januara biti bodovane od strane Lokalne akcione grupe "Zvijezda" (LAG) i Članova APRODEL-a.

## OPĆA BIBLIOTEKA VAREŠ

Opća biblioteka Vareš osnovana je 04. januara 1958, Odlukom Narod-



nog odbora opštine Vareš broj 629. Biblioteka je kao radna jedinica bila u sastavu Radničkog doma "Branko Jelić" Vareš, a kasnije u sastavu Centra za kulturu "Liljan" Vareš. Od 22. januara 2002. godine, Opća biblioteka Vareš dobija sadašnje ime i status samostalnog pravnog subjekta po Rješenju kantonalnog suda u Zenica broj U/I-309/02 od 23. januara 2002. godine.

Opća biblioteka Vareš se bavi bibliotečkom djelatnošću, koja je od posebnog društvenog interesa, a prema Zakonu o općoj bibliotečkoj djelatnosti opće biblioteke su namijenjene obrazovanju, informiranju i zadovoljavanju kulturnih i drugih potreba stanovništva općenito.

Direktorica biblioteke, prof. Jasmina Šijak u koordinaciji sa ostalim zaposlenicima ove ustanove ima namjeru u 2010-oj godini aktualizirati i približiti svoju djelatnost svojim korisnicima kroz organizaciju bibliotečke sekcije, koja bi mladim Varešanima pokušala pružiti priliku da svoje slobodno vrijeme ispune sadržajima koji bi im bili od velike koristi u budućem životu.

"Cilj nam je da kroz ovu sekciju kod mladih izgradimo samopuzdanje, kako bi postali korisni članovi zajednice u kreiranju zdravog društva", kaže prof. Šijak.

Ova sekcija pri Općoj biblioteci Vareš, bila bi organizovana pod sljedećim motom:

-**"UPOZNAJMO SE S KNJIGOM DA BISMO JE VIŠE VOLJELI"** (za učenike osnovnih škola);

-**"JEDAN RADNI DAN U BIBLIOTECI"** (za učenike srednje škole).

Ovim putem obavještavam sve mlade koji bi željeli da se učlane u ovu sekciju da to mogu uraditi svakim radnim danom u vremenu od 9-14 sati. Članstvo u sekciju je besplatno i otvoreno je od 01. februara 2010. do 01. marta 2010. godine.

## KOMUNALNO- GRAĐEVINSKA INSPEKCIJA

U toku mjeseca januara, komunalno-građevinska inspekcija u saradnji sa civilnom zaštitom je izvršila obilježavanje ruševnih objekata u gradu, odnosno na objekte su postavljene table upozorenja.

Inače, ovi objekti zbog svoje dotrajalosti predstavljaju opasnost, kako za susjedne objekte tako i za sigurnost prolaznika; međutim da bi se pristupilo njihovom uklanjanju, s obzirom na veliki broj suvlasnika, neriješene imovinsko-pravne odnose, te uglavnom nepoznate sadašnje adrese prebivališta suvlasnika neophodno je u najskorije vrijeme donijeti program uklanjanja ruševnih objekata.



Ruševni objekat u ulici Stojkovići



Ruševni objekat u ulici Zvijezda



## ODRŽANA GODIŠNJA SKUPŠTINA NK "VAREŠ"

Dana 20.11.2009. u Velikoj sali Općine Vareš održana je redovna godišnja Skupština Nogometnog kluba "Vareš". Razmatran je Izvještaj o radu i takmičenju, finansijski izvještaj i izvršen izbor predsjedništva NK "Vareš".

Skupštinu NK "Vareš" čini 31 delegat, a bilo je prisutno njih 26.

Sve prisutne delegate je na početku pozdravio predsjednik kluba Hamdo Fatić i u uvodu obrazložio rad Kluba u proteklom periodu a nakon toga je usvojen Izvještaj o takmičenju kao i finansijski izvještaj. Svi prisutni delegati su pozitivno ocijenili opredjeljenje i strategiju Kluba u radu sa mladim i politiku stvaranja vlastitog igračkog kadra a posebno je istaknuto da se na jesen 2010. godine stvaraju svi uslovi za formiranje i prijavljivanje seniorske ekipe iz vlastitog omladin-

skog pogona.

U predsjedništvo Kluba su izabrani: Hamdo Fatić predsjednik, Miralem Čerenić sekretar, članovi Nikola Šimić, Milomir Marošević, Nijaz Žutić, Ilhan Šišić i Zoran Franjković. Za blagajnika je imenovan Emin Gondžo.

## IZDAVANJE LIČNIH DOKUMENATA GRAĐANA PONOVO U PS VAREŠ

Dana 18.01.2010. godine u okviru redovne posjete Policijskoj stanici Vareš ministar unutrašnjih poslova ZDK gospodin Aziz Brotlija je zajedno sa predsjedavajućim Općinskog vijeća gospodinom Josipom Malbašićem i Općinskim načelnikom Hamdom Fatićem prisustvovao svečanom otvaranju šalter sale u Policijskoj stanici Vareš.

U proteklih nekoliko godina građani su u okviru CIPS projekta lične doku-

mente dobivali u šalter salama Pošte, a ovom prilikom je istaknuto da postoji niz razloga zbog kojih je izdavanje ličnih dokumenata vraćeno u Policijske stanice i uprave.

Standardi sigurnosti koje je postavila Agencija za identifikaciona dokumenta podignuti su na znatno veći nivo.

Proteklih godina Vlada ZDK je izdvajala 380.000-400.000 KM godišnje za iznajmljivanje prostora Pošta u svim Općinama ZDK. Uposlenicima PS Vareš kao i samoj policiji omogućeni su znatno bolji radni uslovi i konačno, građanima će biti pružena znatno brža i efikasnija usluga. Ukupna vrijednost radova adaptacije prostora u PS Vareš iznosi 67.500 KM.

Ministar Brotlija je ujedno stanje sigurnosti na području općine Vareš ocijenio kao veoma dobro i istakao da građani u značajnoj mjeri svojom saradnjom sa organima bezbjednosti tome doprinose.





Na osnovu člana 5. stav 2. Zakona o budžetu u Federaciji BiH ("Službene novine Federacije BiH", broj 19/06,76/08 i 05/09 i 32/09.) i člana 22. tačka 3. Statuta općine Vareš, broj 01-25/09. od 29.01.2009. godine, Općinsko vijeće Vareš na 13. sjednici održanoj 22.12.2009. godine, usvojilo je

## O D L U K U

o izvršenju budžeta općine Vareš za 2010. godinu

### I - OPĆE ODREDBE

#### Član 1.

Ovom odlukom se uređuje način izvršavanja budžeta općine Vareš za 2010. godinu, upravljanje prihodima i izdacima budžeta, te prava i obaveze korisnika budžetskih sredstava.

#### Član 2.

Opći dio budžeta se sastoji od bilanse prihoda i izdataka, a posebni dio sadrži detaljan raspored izdataka po budžetskim korisnicima i vrsti izdataka.

U bilansi prihoda i izdataka iskazuju se porezni i neporezni prihodi, dotacija Federacije i Kantona, a kod izdataka su prikazani tekući izdaci, kao što su plaće, naknade, izdaci za materijal, usluge i tekući transferi.

### II – TRANSPARENTNOST I JAVNOST BUDŽETA

#### Član 3.

Budžet prikazuje ukupno i po budžetskim korisnicima sve javne prihode i javne izdatke po stavkama.

Izvršenje budžeta će pratiti Služba za privredu i finansije i o tome podnositi polugodišnji i godišnji izvještaj Općinskom vijeću.

### III – IZVRŠAVANJE BUDŽETA

#### Član 4.

Sredstva budžeta osiguravaju se budžetskim korisnicima (u daljem tekstu: korisnici) koji su u posebnom dijelu budžeta određeni za nosioce sredstava na pojedinim stavkama.

Korisnici koriste budžetska sredstva samo za namjene koje su određene budžetom i to do visine utvrđene u njegovom posebnom dijelu.

#### Član 5.

Sredstvima budžetske rezerve može raspolagati općinski načelnik, uz prethodnu saglasnost Općinskog vijeća.

#### Član 6.

Korisnici koriste sredstva budžeta u skladu sa svojim godišnjim finansijskom planu, a po dinamici utvrđenoj tromjesečnim planovima.

#### Član 7.

Korisnici moraju pri dogovaranju o uslovima za ispunjavanje obaveza koje se podmiruju iz budžeta, uzimati u obzir utvrđenu dinamiku priliva i odliva sredstava.

#### Član 8.

Budžet se izvršava na osnovu tromjesečnih planova za izvršenje budžeta, u skladu sa raspoloživim sredstvima.

#### Član 9.

Korisnici su obavezni Službi za privredu i finansije općine Vareš dostaviti tromjesečne finansijske planove za izvršenje budžeta 15 dana prije početka tromjesečja.

Ako korisnik ne podnese prijedlog tromjesečnog finansijskog plana u roku iz stava 1. ovog člana, tromjesečni plan za tog korisnika utvrđuje Služba za privredu i finansije općine Vareš.

#### Član 10.

Služba za privredu i finansije prenosi neutrošena sredstva po pojedinim stavkama izdataka iz tromjesečnog plana izvršenja budžeta na iste stavke u naredni tromjesečni plan izvršenja budžeta iste budžetske godine.

#### Član 11.

Sredstva raspoređena budžetom ne mogu se preraspodjeljivati između korisnika, bez saglasnosti Općinskog vijeća.

#### Član 12.

Budžet će se izvršavati po slijedećim prioritetima:

1. plaće i naknade zaposlenih i naknade vijećnicima,
2. materijalni troškovi organa uprave i klubovi političkih stranaka koje partipiraju u Vijeću,
3. tekući transferi i
4. o s t a l o .

### III - ZAVRŠNE ODREDBE

#### Član 13.

Za sve ono što nije regulisano ovom odlukom, primjenjivat će se odredbe člana 25. do 37. Zakona o budžetima u Federaciji Bosne i Hercegovine ("Službene novine Federacije BiH", broj 19/06,76/08 i 05/09 i 32/09).

#### Član 14.

Ova odluka stupa na snagu osmog dana od dana objavljivanja na oglasnoj ploči Općine Vareš, a primjenjivat će se od 01.01.2010. godine.

Broj: 01-222/09  
Vareš, 22.12. 2009. godine

PREDSJEDAVAJUĆI OPĆINSKOG  
VIJEĆA VAREŠ  
Josip Malbašić



Temeljem članka 22. Statuta općine Vareš, broj: 01-25/09 od 29.01.2009. godine i članka 52. Poslovnika o radu Općinskog vijeća Vareš - Prečišćeni tekst, broj: 01-109/09 od 29.04.2009. godine, Općinsko vijeće Vareš na 13-toj sjednici održanoj dana 22.12. 2009. godine, donosi

## PROGRAM RADA

Općinskog vijeća Vareš za 2010. godinu

### I – U V O D

Program rada Općinskog vijeća Vareš za 2010. godinu čine akti iz studijsko – analitičke, informaciono - dokumentacione i normativno – pravne djelatnosti iz nadležnosti Općinskog vijeća Vareš, koje su propisane Ustavom ZE-DO kantona, zakonima i Statutom općine Vareš.

S ciljem sagledavanja stanja u određenim oblastima iz nadležnosti Općine i poduzimanja mjera za poboljšanje stanja u tim oblastima, Programom je planirano razmatranje informacija i izvješća.

Sadržaj Programa čine studijsko – analitički, informaciono – dokumentacioni i normativno – pravni akti.

### II – SADRŽAJ PROGRAMA

A) STUDIJSKO – ANALITIČKI I INFORMACIONO – DOKUMENTACIONI AKTI

#### Razdoblje: siječanj – ožujak

1. Izvješće o izvršenju općinskog proračuna u 2009. godini

Nositelj izrade: Služba za gospodarstvo i financije

Predlagatelj: općinski načelnik

2. Informacija o projektima obnove

stambenih objekata na području općine Vareš u 2009. godini

Nositelj izrade: Služba za prostorno uređenje i obnovu

Predlagatelj: općinski načelnik

3. Izvješće o radu Jedinственog općinskog organa uprave općine Vareš i općinskog načelnika za 2009. godinu

Nositelj izrade: Općinski načelnik i općinske službe za upravu

Predlagatelj: općinski načelnik

4. Izvješće o realizaciji Programa rada Općinskog vijeća Vareš za 2009. godinu.

Nositelj izrade: Stručna služba Općinskog vijeća i općinskog načelnika i predsjedavajući Vijeća.

5. Izvješće o radu PS Vareš s ocjenom stanja sigurnosti za 2009. godinu

Nositelj izrade: PS Vareš

6. Informacija o zimskom održavanju lokalnih i regionalnih putova i gradskih ulica

Nositelj izrade: Služba za prostorno uređenje i obnovu

Predlagatelj: općinski načelnik

7. Prijedlog Programa rada općinskog načelnika za 2010. godinu

Nositelj izrade: općinski načelnik

Predlagatelj: općinski načelnik

8. Informacija o obnovljenim stambenim jedinicama na području općine Vareš, za period 1998. do 2009. godine

Nositelj izrade: Služba za prostorno uređenje i obnovu

Predlagatelj: općinski načelnik

9. Informacija o zaposlenosti u državnom i privatnom sektoru, u svim oblastima s podacima o nezaposlenim na području općine Vareš

Nositelj izrade: Služba za gospodarstvo i financije

Predlagatelj: općinski načelnik

10. Informacija o stanju i problemima urbanizma i načinu zaštite urbanih dijelova općine i grada

Nositelj izrade: Služba za prostorno uređenje i obnovu

Predlagatelj: općinski načelnik

11. Informacija o efektima rada Turist – info biroa Vareš za 2009. godinu

Nositelj izrade: Turist – info biro i Služba za društvene djelatnosti i BIZ

Predlagatelj: općinski načelnik

12. Informacija o ostvarenim prihodima u 2009. godinu po osnovu odluka Općinskog vijeća Vareš, i to:

1. Odluke o administrativnim taksama,

2. Općinskim komunalnim taksama,

3. Komunalnoj naknadi,

4. Korištenju građevinskog zemljišta,

5. Naknadama Fonda za vatrogastvo

Nositelj izrade: Služba za gospodarstvo i financije i Služba za prostorno uređenje i obnovu

Predlagatelj: općinski načelnik

#### Razdoblje: travanj – lipanj

13. Informacija o primjeni Zakona o šumama F BiH

Nositelj izrade: Služba za gospodarstvo i financije

Predlagatelj: općinski načelnik

14. Informacija o realizaciji Ugovora o koncesijama

Nositelj izrade: Služba za gospodarstvo i financije

Predlagatelj: općinski načelnik



15. Informacija o rekonstrukciji i izgradnji regionalnog puta R – 444

Podlugovi – Breza – Vareš – Vijaka - Podkamensko

Nositelj izrade: Služba za prostorno uređenje i obnovu

Predlagač: općinski načelnik

16. Izvješće o radu Općinskog pravobraniteljstva za 2009. godinu

Nositelj izrade: Općinsko pravobraniteljstvo

17. Informacija o predloženim i odobrenim projektima za Program kapitalnih ulaganja Vlade ZE-DO kantona za 2010. godinu

Nositelj izrade: Služba za prostorno uređenje i obnovu

Predlagač: općinski načelnik

18. Informacija o stanju kulturno-historijskih spomenika i spomen obilježja iz rata, na području općine Vareš

Nositelj izrade: Služba za društvene djelatnosti i BIZ

Predlagač: općinski načelnik

19. Izvješće o radu i poslovanju JKP Vareš za 2009. godinu

Nositelj izrade: Skupština i Uprava Javnog poduzeća

20. Izvješće o radu i poslovanju JP Vareš-stan Vareš za 2009. godinu

Nositelj izrade: Skupština i uprava Javnog poduzeća

21. Izvješće o zdravstvenom stanju stanovništva i organizaciji zdravstva na području općine Vareš u 2009. godini

Nositelj izrade: Upravni odbor i Dom zdravlja Vareš

22. Izvješće o radu JU Centar za socijalni rad Vareš za 2009. godinu

Nositelj izrade: Upravni odbor i direktor JU Centar za socijalni rad Vareš

23. Izvješće o radu JU Opća biblioteka Vareš za 2009. godinu

Nositelj izrade: Upravni odbor i direktor JU Opća biblioteka Vareš

24. Izvješće o radu JPU "Dječji vrtić" Vareš za 2009. godinu

Nositelj izrade: Služba za društvene djelatnosti i BiZ i Upravni odbor

25. Izvješće o radu JU Centar za kulturu i edukaciju Vareš za 2009. godinu

Nositelj izrade: Upravni odbor i direktor JU Centar za kulturu i edukaciju Vareš

26. Informacija o nivou zaštite RVI i obitelji poginulih branitelja na području općine Vareš

Nositelj izrade: Služba za društvene djelatnosti i BIZ

Predlagač: općinski načelnik

27. Informacija o nivou zaštite demobiliziranih branitelja na području općine Vareš

Nositelj izrade: Služba za društvene djelatnosti i BIZ

Predlagač: općinski načelnik

28. Informacija o radu savjeta mjesnih zajednica i realizaciji programa rada mjesnih zajednica

Nositelj izrade: Služba za društvene djelatnosti i BIZ

29. Elaborat o stanju lokalne putne mreže na području općine Vareš i o potrebama financijskih sredstava za zimsko i ljetno održavanje putova

Nositelj izrade: Služba za prostorno uređenje i obnovu

Predlagač: općinski načelnik

30. Informacija o aktivnosti i radu Forumu o sigurnosti u zajednici u općini Vareš, u 2009. godini

Nositelj izrade: Služba za društvene djelatnosti i BiZ i Forum o sigurnosti

Predlagač: općinski načelnik

## Razdoblje: srpanj – rujanj

31. Izvješće o realizaciji Programa rada Općinskog vijeća Vareš za I. polugodište 2010. godine

Nositelj izrade: Stručna služba Općinskog vijeća i općinskog načelnika i predsjedavajući Vijeća

32. Informacija o registriranim nevladinim organizacijama i udruženjima građana na području općine Vareš, njihove aktivnosti i rad u 2009. godini

Nositelj izrade: Služba za društvene djelatnosti i BiZ

Predlagač: općinski načelnik

33. Informacija o provođenju Omladinske politike na području općine Vareš

Nositelj izrade: Služba za društvene djelatnosti i BiZ i Komisija za pitanja mladih

Predlagač: općinski načelnik

34. Informacija o primjeni Etičkog kodeksa izabranih dužnosnika općine Vareš

Nositelj izrade: Etička komisija Općinskog vijeća

35. Izvješće o izvršenju općinskog proračuna za prvo polugodište 2010. godine

Nositelj izrade: Služba za gospodarstvo i financije

Predlagač: općinski načelnik

36. Informacija o vodoopskrbi i odvozu smeća na području općine Vareš

Nositelj izrade: Služba za prostorno uređenje i obnovu i Javno komunalno poduzeće Vareš

37. Informacija o provođenju Strategije razvoja općine Vareš

Nositelj izrade: Komisija KPOR.



## **Razdoblje: listopad – prosinac**

38. Informacija o stanju lokalne i regionalne putne mreže na području općine Vareš

Nositelj izrade: Služba za prostorno uređenje i obnovu

Predlagač: općinski načelnik

39. Informacija o postignutom uspjehu u učenju i vladanju u školskoj 2009./10. godini u osnovnim školama "Vareš" i "Vareš Majdan" i MSS "Nordbat 2" Vareš

Nositelj izrade: Služba za društvene djelatnosti i BIZ

40. Informacija o provođenju Odluke o komunalnom redu općine Vareš za 2009. godinu

Nositelj izrade: Služba za prostorno uređenje i obnovu

Predlagač: općinski načelnik

41. Informacija o stanju poljoprivredne proizvodnje na području općine Vareš

Nositelj izrade: Služba za gospodarstvo i financije

Predlagač: općinski načelnik

42. Informacija o stanju napajanja električnom energijom na području općine Vareš i mjerama na poboljšanje iste

Nositelj izrade: Služba za prostorno uređenje i obnovu

43. Informacija o provedenim općim izborima na području općine Vareš

Nositelj izrade: OIK Vareš

44. Informacija o realizaciji Programa kapitalnih ulaganja na području općine Vareš za 2010. godinu

Nositelj izrade: Služba za prostorno uređenje i obnovu

Predlagač: općinski načelnik

45. Informacija o stanju gradske higijene i prijedlog mjera za poboljšanje iste

Nositelj izrade: Služba za prostorno uređenje i obnovu

Predlagač: općinski načelnik

## **B – NORMATIVNO – PRAVNI AKTI**

1. Prijedlog Odluke o prosječnoj konačnoj građevinskoj cijeni u 2009. godini m<sup>2</sup> korisne stambene površine u državnom vlasništvu na području općine Vareš

Nositelj izrade: Služba za prostorno uređenje i obnovu

Predlagač: općinski načelnik

Rok: I kvartal 2010. godine

2. Prijedlog Odluke o proglašenju Dana općine Vareš

Nositelj izrade: političke stranke na području općine Vareš

Rok: I kvartal 2010. godine

3. Prijedlog Odluke o vodovodu i kanalizaciji

Nositelj izrade: Služba za prostorno uređenje i obnovu

Predlagač: općinski načelnik

Rok: I kvartal 2010. godine

4. Prijedlog Odluke o naknadama vijećnika i članova radnih tijela OV Vareš

Nositelj izrade i predlagač: općinski načelnik

Rok: I kvartal 2010. godine

5. Prijedlog Odluke o komunalnom redu

Nositelj izrade: Služba za prostorno uređenje i obnovu

Predlagač: općinski načelnik

Rok: I kvartal 2010. godine

6. Nacrt i Prijedlog Proračuna općine Vareš za 2011. godinu

Nositelj izrade: Služba za gospodarstvo i financije

Predlagač: općinski načelnik

Rok: IV kvartal 2010. godine

## **III - RADNA TIJELA OPĆINSKOG VIJEĆA VAREŠ**

Poslovníkom o radu OV Vareš propisano je da Općinsko vijeće osniva komisije kao stalna radna tijela i povremena radna tijela za vršenje poslova iz propisanog im djelokruga.

Radna tijela Općinskog vijeća će tokom cijele godine kontinuirano razmatrati materijale i davati mišljenja Općinskom vijeću, odnosno vršiti poslove koji su im određeni Poslovníkom i drugim aktima Općinskog vijeća.

Općinsko vijeće će odlučivati o izborima i imenovanjima, razmatrati ostavke, provoditi postupak za utvrđivanje odgovornosti i smjenjivanja s funkcije.

Općinsko vijeće će po ukazanoj potrebi donositi odluke o vjerodostojnom tumačenju akata koje donosi Općinsko vijeće

## **IV - ZADACI I CILJEVI PROGRAMA**

Realizacijom zadataka postavljenih u Program rada Općinskog vijeća za 2010. godinu, mnoge oblasti iz nadležnosti Općine uskladit će se s Kantonalnim propisima, čime će se stvoriti pretpostavke za bolje funkcioniranje Općine, ostvarivanje prava građana i ekonomski prosperitet.

Za izvršenje utvrđenih zadataka iz Programa rada Općinskog vijeća zadužen je u principu općinski načelnik, kao



rukovoditelj Jedininstvenog općinskog organa uprave Općine Vareš.

Utvrđeni zadaci samo obvezuju Jedininstveni općinski organ uprave, a ničim ga ne ograničavaju u poduzimanju i drugih mjera i aktivnosti glede realizacije, kako utvrđenih ciljeva, tako i u izvršavanju njenih ostalih obveza utvrđenih važećim propisima.

Zaduženja Jedininstvenog općinskog organa uprave ne ograničavaju, niti eliminiraju mogućnost da i drugi subjekti, sukladno članku 108. Poslovnika o radu Općinskog vijeća Vareš, podnose nacрте, odnosno prijedloge odluka i drugih akata, odnosno informacija i prijedloga.

Zadaci utvrđeni Programom rada Općinskog vijeća Vareš su samo okvirni i određeni u minimumu. Ovlašteni

predlagači i obrađivači se ovim programom ne ograničavaju, nego od njih Općinsko vijeće očekuje nove inicijative i prijedloge u toku 2010. godine, koji će se po propisanoj proceduri Poslovnika o radu Općinskog vijeća uvrštavati u dnevni red sjednica i voditi rasprave o istim.

## **V - STUPANJE NA SNAGU**

Program rada Općinskog vijeća Vareš stupa na snagu danom donošenja, a objavit će se na oglasnoj ploči općine Vareš i u Informativnom biltenu općine Vareš.

PREDSJEDAVAJUĆI  
OPĆINSKOG VIJEĆA VAREŠ

Josip Malbašić

## **USVOJEN BUDŽET OPĆINE VAREŠ ZA 2010. GODINU**

Na 13-toj sjednici Općinskog Vijeća Vareš održanoj dana 22.12.2009. godine usvojen je budžet Općine Vareš za 2010. godinu, uz dva prihvaćena amandmana koji će biti objavljeni u narednom broju Informativnog biltena Općine Vareš.